

RATANA ME NGA TIAPANI.

Rotorua,

Hanuere 15th, 1925.

I TE hokinga atu o nga tangata i te hui i Ratana ki Rotorua, ka tu te hui ki Te Papa-i-Ouru, ara ki a Tamatekapua. I taua hui ka panuitia e te kai-whakahaere o te Kawenata a Ratana, nga kauwhau a Ratana i te Hui Kirihimete. Ka puta i roto i ana korero tenei kupu:—"Kua marenatia e Ratana te iwi Maori ki te iwi Tiapani, a ko te ora mo te iwi Maori kei roto i nga ringaringa o te Tiapani."

Ka whakahengia tenei kupu a Ratana e te Arawa, a takoto ana tenei motini:—

Ko Ngati Whakaue e noho atu nei i runga i to ratou marae tapu i Te Papa-i-Ouru, e whakaatu ana i to ratou piri-pono kia Kingi Hori tuarima; a, ahakoa pehea te hurihanga o nga whakaaro o etahi o nga hapu o te iwi Maori, he whakaatu tenei ki nga kai-whakahaere o te mana o to tatou Kingi, ko Ngati Whakaue ka piri-pono tonu ki te taha ki te ture me te noho pai.

He mihi hoki tenei ki te Karauna mo te pai me te tika o tana whiriwhiri i nga raruraru katoa o te iwi Maori e whakatakotoria tikatia atu ana ki tona aroaro.

E mihi ana matou, e whakawhetai ana hoki, mo enei painga katoa kua puta ki te iwi Maori.

I te wa o te pakanga nui o te ao, ka tapaea atu e matou a matou tamariki hei hapai i te mana o to tatou Kingi, hei pupuri i nga painga e ahu mai nei ki te iwi Maori i runga i nga kau-papa o te Tiriti o Waitangi.

Kei te pouri matou mo tenei takahanga a Ratana i te piri-pono o te iwi Maori. Kua hoki o matou whakaaro ki nga kupu a o matou matua i ki ai: "Kia piri-pono koutou ki a Kuini Wikitoria, a ki te maranga mai he iwi e takahi ana i te mana o te Kuini, ko koutou hei kohatu wawahi i te motu."

TE WHAKAHOKI A PITA MOKO.

"Kaore ano kia puta he kupu ma Ratana kia whakakotahitia te iwi Maori me te Tiapani, a e whakahe ana ia ki nga korero o te hui o Rotorua. I haere matou ki Tiapana ki te kauwhau i te Rongopai. No to matou taenga atu ka manaakitia matou e te Tiapani ki te manaaki whanaunga, a, i runga i nga pata-patai kitea ana he tatanga ano to te iwi Maori ki te Tiapani."

Kaore a Ratana i tuku tangata hei mangai mona ki Rotorua. Engari he tangata no Rotorua i tae mai ki te hui i Ratana, a ko ia pea taua tangata. I whakamarama a Ratana i tana hui ko nga toto o te iwi Maori raua ko te Tiapani e kotahi ana i runga i te whanaungatanga.